

Der Groff / Das er gefürstet sy  
Der fürst die kron des künigs gert  
Vil werden ritter / die keyn schwert  
Sünt bruchen für gerechtikeyt  
Die buren tragen syden kleit  
Vnd gulden ketten an dem lib  
Es kunt da har eyns burgers wib  
Vil stölzer dann eyn gräfin düt  
Wo yetz gelt ist / do ist hochmüt  
Was eyn ganß von der andern sycht  
Sar vff on vnderloß sie dicht  
Das muß man han / es düt sunst we  
Der Adel hat keyn vorteyl me  
Man findt eyns hantwercks mannes wib  
Die bessers wert dreit an dem lib  
Von rock / ryng / mäntel / borten schmal  
Dan sie jm huß hat überall  
So mit verdyrbt manch byderman  
Der mit sym wib muß bättlen gan  
Im wynter drincken vß eym krüg  
Das er sym wib mög thun genüg  
Wann sy hüt hatt alls das sy gelangt  
Gar bald es vor dem kouffler hangt  
Wer frowen glust will hengen noch  
Sen frürt gar dick / so er spricht schoch  
Inn allen landen ist groß schand  
Keynen benügt me / mit sym stand  
Nyemans denckt wer syn vorderen worē  
Des ist die welt yetz ganz voll doren  
Das ich das worlich sagen magē  
Der dry spitz / der muß inn den sack

